

Likhomo Basotho

Nako ea Keresemese, mafelo a selemo le ho thoaso ha se secha, e boetse e fihlile. Re le sechaba sa Basotho, re kopana le Bakreste ka lefatše lohle ho hopola ka thabo tsoalo ea Morena le Mopholosi oa rona Jesu Kreste. Ka ho fetisisa, ke nako ea teboho ho Morena le 'Mopi oa rona ha a re babaletse ho fihlela mona, le hona ho ikopela hore a 'ne a re sitse ka bophelo bo botle le mahlohonolo selemong se secha.

E boetse ke nako eo malapa le metsoalle ho kopanoang ho thaba le ho keteka 'moho. Empa ka bomalimabe, hona nakong ena, har'a thabo ena e kana, ke hona moo sekhahla sa tsohle tse mpe le tse sithabetsang maikutlo se phahamang. Ka hona ke ipiletsa ho lona chaba sa Moshoeshoe, haholo lona ba bacha, hore Keresemeseng ena le mafelong ana a selemo, re iphutheng, re qobeng ho ba liphofu kapa mahlatsipa, esita le bona baetsi ba liketso tsena tse malimabe.

Ho feta moo, nako ena ea mafelo a selemo, ke nako ea boitlhahlobo. Motho ka mong a ke a ipotse hore na hantle-ntle o entse eng e molemo selemong sena, e ka ba ke lapeng, mosebetsing, kerekeng, motseng moo a phelang teng, esita le

naheng ka kakaretso. Ka boitlhahlobo bona re tla tseba ho fetola maoa moo ho lokelang, e le hore re keneng selemong se secha re le morolo, tsela ea rona e hlakile, 'me re ikemiselitse ho etsa hantle le ho feta.

Selemo sena sa 2009 se ikhethile har'a lilemo tse ling ka litsela tse ngata. Khetlo la pele paleng ea naha ena, re bile le litlhaselo motebong oa sesole Makoanyane le lapeng ha Tona-kholo, Maseru West, tseo ho tsona ho neng ho sebelisoa masole a hiriloeng a tsoang kantle ho Lesotho (mercenaries). Sena se bontša hore ho na le batho ba ikemiselitseng ho etsa sohle se matleng a bona, ho kenyeletsa le tšollo ea mali, hore ba hlokisitse Lesotho khotso le botsitso. E re ka ha mohau oa Molimo ke koeetsa, ka lehlakoreng la ba hlaseloang ha hoa ba le likotsi kapa hona ho hlakahala ha batho. Athe ka lehlakoreng la bahlaseli ho bile le ba hlokahalang, le mahlatsipa le ba ileng ba tšoaroa. Linyeoe li ntse li tsoela-pele ka makhotleng a molao. Ho feta moo, 'Muso o mothating oa ho theha Komisi ho etsa lipatlisiso tse tebileng malebana le litlhaselo tsena.

Litholoana tse bohloko ka ho fetisisa tsa liketsahalo tse kang tsena ke hore naha ea rona e qetella e bapisoa le linaha tse ling tse hloakang khotso le botsitso ka lebaka la meferefere ea tsona . 'Nete

ke hore naha ea rona e hole haholo le maemo a fumanehang linaheng tsena.

Ntlha ea bobeli ke ho kenngoa tšebetsong hoa mokhoa o mocha oa ho laola lichelete tsa 'Musu, e leng Integrated Financial Management and Information System (IFMIS). Ho bonahetse mathata sethathong, haholo tabeng ea tefo ea ba faneng ka litšebeletso ho 'Musu. Ho bile le tieho e kholo hoo e batlileng e senya likamano pakeng tsa mahlakore ana a mabeli. Leha ho le joalo ke tšepa hore hona e ne e mpa e le mathata a tsela e ncha ea tšebetso; tsohle li tla loka ha li tloaela lekhulo.

Taba ea boraro ke maemo a hloabaetsang a moruo oa lefatše ka kakaretso (global financial crisis), ao boemo ba 'ona bo bonahalang le ho utloahala haholo linaheng tse nyenyane le tse moruo o tetemang joaloka Lesotho. Re bone ha lifeme tse ling li fokotsa basebetsi. Athe tse ling tsona li hlile tsa koaloha, batho ba felloa ke mesebetsi. Merafo ea rona ea taemane, le eona e ntse e amehile ka tsela e tšoanang. Le mohloli oa rona o moholo oa chelete, e leng SACU, o ile oa angoa ke maemo ana a moruo oa lefatše. Leha ho le joalo, ha se 'nete ho hang hore 'Musu oa Lesotho o chonne. Mafosisa ana ke maiqapelo a malimabe a ba sa lakaletseng naha ea rona katleho.

Leha ho bile le mathata ana, le a mang ao ke sa a lokolisang mona, ka kakaretso re ntse re sebelitse hantle lintlheng tse ngata. Joaloka ha le tseba hore Lesotho ke setho Boitlhahlobong ba Methaka ba Linaha tsa Afrika (African Peer Review Mechanism), naha ea rona e ile ea hlahlojoa ka katleho e kholo ka Phupu monongoaha, phuthehong ea Lihlooho tsa Linaha le Mebuso tsa African Union, mane Tripoli, Libya. Boiteko ba rona ba ho sebeletsa ho tebisa metso ea puso ea sechaba ka sechaba (good governance), ho ba le puso e ntle, e nang le ponaletso linthong tsohle (transparency), le ho tsitlallela ho sebelisa litsela tsa molao ka nako eohle (the rule of law), bo ile ba pakoa le ho thoholetsoa. Ntho e thabisang ka ho fetisisa ke hore tlaleho ena ea boitlhahlobo e ne e itšetlehile holim'a maikutlo a sechaba sa Basotho ka methati eohle ea sona.

Leha ho le joalo, tlaleho e supile mathata a kang seoa sa HIV le AIDS se nang le kabelo e kholo phokotsehong ea palo ea sechaba sa Basotho; le bobolu esita le a mang. Ana ke mathata ao 'Muso o seng o nkile mehato ea ho a loantša e kang ho thehoa hoa Lekalana la Toantšo ea Bobolu, le seng le atlehile ho hlahlela linyeoe ka makhotleng moo tse ling li seng li ahlotsoe, ha tse ling li ntse li tsoela-pele; ho etsa meralo le matšolo a toantšo ea HIV le AIDS a kang “Tseba Boemo ba Hau”, phumantšo ea litlhare tse sa

lefelloeng tse thethefatsang bohale ba AIDS (ARVS) ho ba lokelang; thibelo ea tšoaetso ho tloha ho 'm`a ho ea ho lesea; ho matlafatsa matšolo a thibelo ea tšoaetso ea HIV; le ho ntlafatsa litšebeletso tsa bophelo, haholo-holo libakeng tse kahare-hare ho lithaba tse sa fihleleheng habobebe, esita le phumantšo ea litšebeletso tsa mantlha tsa bophelo ntle ho litemo hohle litsing tsa bophelo.

Ho feta mona, tekong ea oona ea ho tsitlallela puso e nang le tsotello le pelo-keleli ho batho, 'Muso oa Motlotlehi o ile oa ntšetsa pele maano a ho phallela ba tlokotsing, maqheku, ba nang le bokooa, bana le likhutsana ka litsela tse fapakaneng tse kang lipenchene tsa maqheku; litsiane ho ba nang le bokooa le likhutsana; thuto ea mathomo e sa lefelloang ke batsoali, e tlamang; litefello likolong tse phahameng bakeng sa likhutsana le ba hloakang; tlatsetso thekong ea libuka likolong tse mahareng; lihlapiso lijunifesithing le litsing tse ling tsa thuto e holimo; ho thusa batho ba kojoana li mahetleng ka boemeli makhotleng a molao le ho ba fumanela matšeliso bakeng sa likotsi kapa mafu tšebetsong, haholo ho la Afrika Boroa; le ho theha mesebetsi ea ntlafatso e kang ea thibelo ea khoholeho ea mobu, khaho ea matamo le litsela, le temo ea joang le lifate, eo ho eona batho ba

sebetsang ka ho fapanyetsana 'me ba lefshoang bakeng sa tšebetso eo.

Boikitlaetso ba 'Musu bo bile matla ntlafatsong ea maemo a bosebeletsi ba sechaba. Boemo ba khiro ba bahlanka ba sechaba ba 4 900 bo nyolletsoe boemong ba “pensionable terms,” 'me ho tloha joale ba se ba tla fumana penchene ha ba e-ea phomolong, ha pele ba ne ba lebohuoa ka “gratuity” feela. Meputso le lipenchene li ntlafalitsoe, le nako ea tefo ea litsiane ho ba eang phomolong e se e khutsufetse haholo. Mekhahlelo e meng ea basebetsi e fokolelitsoe boima ba lekhetho la PAYE ho tloha ho 25% ho ea ho 22%. Re thehile setsi sa ho amohela le ho hlabolla mahlatsipa a tthekefetso, 'me khiro ea basebetsi ba setsi sena e se e le mocheng.

Mafapha a tšireletso a sepolesa, sesole, mautloela le tlhabollo ea batšoaruoa, a sebelitse ka thata polokong ea khotso le toantšong ea botlokotsebe ka har'a naha, haholo nakong ea litlhaselo tseo ke seng ke li boletse. Leha ho le joalo tlhaselo ena e re rutile hore re tlameha ho tiisa haholo tšebetsong ea rona ea mautloela le tšireletsong ea naha ka kakaretso.

Lesotho le ile la romela mokhethoa boikoetlisong ba kopanelo ba Leboho la khotso la “SADC Standby Force”, bo neng bo

tšoaretsoe Afrika Boroa. Mokhethoa oo o neng o bopiloe ka mapolesa, masole le masafileone o ile oa ipabola tšebetsong ena. Ho feta mona, Sesole sa Lesotho se ile sa emeloa moketeng oa lilemo tse mashome a mane oa Letsatsi la Naha ea Libya, moo ho neng ho kopane mabotho a linaha tse ngata tsa Afrika le linaha tse ling tsa lefatše; 'me le hona moo mokhethoa oo o ile oa ipabola ka tšebetso e tsoileng matsoho.

Litabeng tsa moruo, re atlehile ho fihlela kholo ea moruo ea 1.7% le har'a mathata a ho putlama ha moruo oa lefatše ka kakaretso. Re boetse re tekenetse chelete ea lithuso (grants) e ka etsang M5 627 milione le ea likalimo e ka etsang M325 milione mekhatlong e fapakaneng ea lefatše bakeng sa mesebetsi ea ntlafatso ea naha. Re boetse re atlehile ho fuoa phokoletso ea molato (Debt relief) ea M10.9 milione tlas'a "United Kingdom Multilateral Debt Relief Initiative".

Ho tsa khoebo teng, khatelo-pele e kholo e bile ho thehoa le ho thakholoa hoa Lekhotla la Lesotho la Khoebo (Business Council of Lesotho) ka Mphalane monongoaha. Lekhotla lena ke kananelo ea 'Musu hore kholiso ea khoebo ke senotlolo sa ntlafatso ea moruo; le hore bahoebi ke bona ba tšoereng thipa ka bohaleng. Ho feta mona, ho butsoe setsi se seholo, sa morao-rao sa Mabenkele sa

“Pioneer Shopping Complex”, Maseru ka Pulungoana. Se thabisang le ho feta ke hore setsi sena ke tholoana ea boikopanyo ba bana ba Basotho.

Ho boetse hoa buloa feme e kholohali ea Phillips e etsang mabone a baballang motlakase. Feme ena e ikhethile Afrika mona.

Tlhahiso ea taemane Lesotho e ile ea angoa haholo ke ho theoha hoa litheko tsa taemane limmarakeng tsa lefatše ka baka la ho putlama ha moruo oa lefatše. Morafo oa Liqhobong o bile oa emisa tlhahiso ea taemane, ha oa Letšeng oona o ile oa fokotsa tlhahiso. Leha ho le joalo pokello ea lekhetho la thekiso ea taemane e fetile khakanyo ea rona ea M17 milione 'me ea fihla ho M53 milione, ka ha joale litheko tsa taemane li boetse li ntlafetse limmarakeng tsa Lefatše.

Phepelo ea metsi le motlakase le eona e eketsehile haholo monongoaha. Ke batho ba fetang 79 000 ba fumantšitsoeng metsi a hloekileng metseng, ha ba fetang 2 000 bona ba ahetsoe matloana. Phepelo ea metsi metseng ea litoropo le eona e phethetsoe Mazenod, Moshoeshoe I International Airport le metse e haufi. Khatelo-pele e se e le kholo tokisetsong ea morero o moholo oa khaho ea Letamo la Metolong. Tsela e kholo e

kopanyang Maseru le Morero oo, e phethetsoe 'me phepelo ea motlakase e se e fihlile setšeng sa Morero. Tumellano e fihletsoe le 'Muso oa Afrika Boroa ka mokhahlelo oa bobeli (Phase II) oa Morero oa Metsi a Lihlaba tsa Lesotho , 'me ho tla ahoa Letamo Polihali mane Mokhotlong.

Malapa a ka bang 11 000 a fumantšitsoe motlakase, athe a 750 tikolohong ea Mokhotlong, Thaba-Tseka le Qacha's Nek, oona a fumantšitsoe motlakase oa letsatsi.

Temong teng, ka leano la oona la toantšo ea bofuma le kanetso ea lijo, 'Muso oa Motlotlehi o ile oa boela oa etsa tlatsetso ho lihoai hore li tsebe ho ea masimong ka bongata. Malapa a fetang 25 000 a ile a khahlametsoa ka lipeo le thepa ea ho teha mehoma, ka tlatsetso ea European Union. Ho feta mona, lihoai li etselitsoe theolelo ea 30% thekong ea lipeo le monontša, esita le litšenyehelong tsa lekote.

Re atlehile ho hlahisa peo ea litapole ea mekotla ea boima ba 25kg e fetang 3 000 libakeng tse tšoaetsoeng ho atisa peo Ha Marakabei, 'Melikane, Mphaki, Semonkong le Mokhotlong. Peo ena kaofela e rekiloe ke lihoai. Ka tsela e tšoanang, re rupetse lihoai tse 35 ho

hlahisa lipheleu tsa farelane le tse 45 ho hlahisa likolobe e le ho bebofaletsa barui ba liphoofole tsena ho ntlafatsa mehlape ea bona.

Puso ea Libaka e ikakhetse ka setotsoana tšebetsong ea khaho ea litsela metseng, metsaneng le litoropong hohle kahar'a naha. 'Me e hlahisitse menyetla ea mesebetsi ka holimo ho ntlafatso ea bophelo le moruo ka tšebetso ena. Makhotla a Puso ea Libaka a kene seahlolong le bahoebi ho hloekisa tikoloho ka ho phutha bohlasoa le ho bo lahlela lithotobolong tse hloailoeng. Thotobolo ea Ha Tšosane, mona Maseru, e neng e lula e foqoha mosi o kotsi ka lilemo-lemo, e se e laoloa hantle 'me mosi oo joale o fentsoe. Ena ke khatelo-pele e kholo haholo toantšong ea tšilafalo ea tikoloho (pollution).

Re thakhotse khaho ea marokho Senqu le Senqunyane sebakeng sa Hloahloeng le borokho ba Senqu Ha Mohlapiso ho kopanya mabatooa a Qacha's Nek le Lebakeng. Re phethetse khaho ea borokho ba Qhoali sebakeng sa Mphaki, 'me re qalile le khaho ea borokho bo bocha ba Seapala, pakeng tsa Mt. Moorosi le Quthing. Re ntse re aha mokhahlelo oa ho qetela oa litsela tsa Likalaneng ho ea Thaba-Tseka le ho tloha Mantšonyane ho ea Lesobeng. Khaho ea litsela tsa letšoana tsa Literapeng/Tšehlanyane, Maseru/Mafeteng, Oxbow/Mokhotlong le

eona e ntse e tsoela pele hantle. Ke Basotho ba bangata ba fumaneng mosebetsi tšebetsong ena kaofela.

E le ho matlafatsa motheo thutong, re kentse tšebetsong leano la ho hokela sehlopha sa likonyana likolong tse lekholo tsa mathomo. Ho fokotsa tšubuhlellano, ho ntse ho ahoa liphapusi tse 21 tsa sehlopha sa likonyana likolong tse fapakaneng ka har'a naha. Likolong tse mahareng, 'Musu o tlatsane le metsoalle ea oona, o ahile likolo tse 17 tse ncha, 'me o ntse o aha liphapusi tse 188 likolong tse 50 kaofela, naha ka bophara.

Setsi sa Tharollo le Thibelo ea Likhohlano (DDPR) se tšoaretse bahiri le basebetsi lithupelo ho anetsa thuto ka thibelo ea likhohlano mesebetsing. Sena se fokolitse sekhahla sa literaeke tsa basebetsi haholo.

Kamorao ho ketsahalo e bohloko ea ho timela ha Basotho morafong oo e seng oa molao Afrika Boroa, Lekala la Khiri le Bosebetsi le ile la etela merafo ena ho hlokomelisa Basotho kotsi ea ho theohela merafong ka khoroana tsa matsa. Re ntse re buisana le 'Musu oa Afrika Boroa hore ho latela likamano tsa rona tsa nako e telele litabeng tsena tsa basebetsi ba merafo, o mpe o be mohau ho fa Basotho ba qalang ho ea merafong mosebetsi.

Ho tsa bohahlauli, re atlehile ho fumana bo-ramatsete ho tsamaisa setsi sa Ha Lejone le ho bula Hotele ea Molimo-Nthuse hape, ho fokotsa leqeme la matlo a boroko. Re ahile matlo a boroko Tšehlanyane, Liphofung le Sehlaba-thebe. Re boetse re rupetse Basotho ho amohela baeti matlong a bona, le ho ba fa litsebo tsamaisong ea khoebo ea bohahlauli.

Ho tsa likhokahanyo teng, ho hlangoa hoa leqhubu le Bohareng la khaso (Medium Wave Transmitter) sehlabeng sa Thuathe ho anelitse khaso ea se-ea-le-moea kahar'a naha. Tšebeliso ea mehala le eona e atolositsoe hoo 75% ea sechaba e phelang moo litšebeletso tsa mehala li fumanehang. Batho ba nang le mehala ea letsoho (cellular phones) ba ka fumana litšebeletso tsa “internet” mehaleng ea bona. Re phethetse moaho oa Poso Hlotse, o boemong ba ho fana ka litšebeletso tsohle tsa Poso le tsa Banka ea Poso.

Kabong ea Toka teng, monongoaha Lekhotla la Maipiletso (Appeal Court) le atlehile ho lula habeli, 'me le phethetse linyeoe tse 36, ha tse tharo tsona li chechisitsoe. Ho fokotsa tšubuhlellano ka makhotleng Maseru, le ho atametsa tšebetso ea makhotla

sechabeng, Lekhotla le Phahameng (High Court) le ile la lula habeli literekeng tsa Mohale's Hoek le Botha-Bothe.

Paramente e fetisitse Litšoantšo tsa Molao tse robeli ho etsa melao e latelang:

Appropriation (2009/2010) Act, 2009

Criminal Procedure and Evidence (Amendment) Act, 2009

Finance Act, 2009

Education Act, 2009

Labour Code (Amendment) Act, 2009

Lesotho Passports and Travel Documents (Amendment) Act, 2009

Local Government Elections (Amendment) Act, 2009

Local Government (Amendment) Act, 2009

Athe Litšoantšo tsa Molao tse latelang tsona li ne li le matsohong a likomiti ha Lekhotla le ea phomolong ea hlabula:

Land Bill, 2009

Land Administration Authority Bill, 2009, le

Public Meetings and Processions Bill, 2009

Ho tsa Machabeng, Lesotho le khethetsoe ho ba motlatsi oa Molula-setulo oa African Union. La boela la khethoa ho ba Molula-setulo le mohokahanyi oa Linaha tse futsanehileng (Least Developed Countries) boitokisetsong ba 'moka oa Machaba oa Litaba tsa Phetoho ea Maemo a Leholimo "United Nations

Climate Change Conference”, o neng o tšoaretswe Copenhagen, naheng ea Denmark hona khoeling ena.

Ke qetella ka ho lakaletsa Batlotlehi, Likhosatsana tsa Basotho, Senate le 'Maseeiso, le Khosana Tholo, esita le sechaba sohle sa Moshoeshoe Keresemese e monate, mahlohonolo le katleho selemong se secha.

Likhomo Basotho!! And Merry Christmas!!